

Namaste! (Hallo!)

Yeah, noch 3aehalb moenet chani doch scho es wort hindi ;-)
Au susch bini langsam chli i de indischae kultur drin, au wenn s bi mir chli laenger goht, well s jo nid nu ei fremdi kultur isch, sondern dur s zaemaelaebae mit 19 tibeter grad 2 voellig neui weltae sind woni kennelernae darf... ich glaub ich vozell zersch mol chli vom lebae i de schuel, und nochher no von es paar usflueg woni in letschter ziit gmacht han... wer sich meh fuer bildi interessiert ueberspringt am beschtae grad de noegschti abschnitt...

Kulturschock – oder: Tibeter haend e anderi vorstellig vo unterricht

Nee, ganz so krass isch es nid, aber noch es paar wuchae schuel geh hani gmerkt dass mini schueler, under anderem ufgrund vo de art we si in china underrichtaet wordae sind, nid di groestae fans vo spielerischem und interaktivem unterricht sind. Si sind sich gwohnt primaer nu uf de lehrer z losae, und haend mueh z b vom klassaekamerad z lernae, oder sich gegesiitig z korrigiere.

Und si haend au nid so problem demit wenn s eifach zimli strikt noch buech goht, so dass si moeglichst vill „theorie“ lerned. D h das si z b spieli wo mir (oder ich zumindest) als uflockerig aalueged, gar nid unbedingt woend, fuer si isch da meh ziitvoschwendig, und au unnoetig, well si sind jo scho motiviert, si brueched kei so zueckerli...

Da isch scho chli andersch als schuel geh i de schwiiz, und ich hans am aafang au chli schreg gfundae, aber ich han mi au gfreut dass d atmosphaere so offae isch dass si mir das hend choene saege... mir hend ues jetz uf en kompromiss geiniget, und ab und zue moends scho au chli was i miim stiil machae, well ich glaub ihrere kreativitaet schaded da zimli nued ;-)

Grad huet hani mit de eintae klass da spieli gmacht wome en namae uf de stirn het, und mues usaefindae wer me isch, und da haends denn ebe doch au zimli luschtig gfundae...

S unterrichtaet macht aso nach wie vor spass, und s isch echt spannend so underschiid selber choenae z erlebae...

Au susch isch s sehr friedlich mit de schueler, und au mit de lehrer, grad vorgeschter hani mit em computerlehrer karma en chlinae uusflug zumene huegel i de noechi gmacht, und mir sind uf em rueckweg mol wieder uebelst nass wordae (jo, de monsun isch so langsam do, siehe grad wiiter unnae), aber haend ues defuer bimene chai wieder choene ufwaermae...



Ps. s cherzeliecht do isch nid well d schueler speziell romantisch sind, sondern s isch eifach mol wieder en power cut gsi, we momentan grad oepae taeglich, well sobald s mol chli raegnet (und da tuet s momentan 2 mol taeglich, immer schoen geg de oebed, so dass s i de nacht richtig aagnehm isch, aber d strossae defuer immer uebel zwaeg sind, siehe unnae) isch i dem land nix mehr mit strom...



Gokarna

Toent zwor fasch we goa, und isch au zimli i de noechi (es paar stundae wiiter suedlich), aber s isch sehr friedlich und erfuehlt bi wiitem nid da klischee wome vo goa haet, vor allem nid i de off-season... isch es mega friedlichs pilgerdorf mit 4 superedlae straend und extrem freundlichae luet wo eim alli „hoi“ (ebe: „namaste“) saeged... isch gnau s richtig gsi zum mol chli uusspannae vo dem strenge schuel geh ;-)



Und zwuesched innae isch sogar au mol aastrengend, well woni a eim morgae em strand ufem obere foeteli entlang jogged bin haend mi ufzmol es paar indischi fischermannae gfroget oeb ich ihnae hilf es boot an land z zieh... natuerli hani do mitgmacht, denkt da isch doch locker fuer de chesi, aber da boot isch riisig gsi, und ich bin ganz schoen z schwitzae cho (v a well nochher grad no es zweits boot cho isch ;-)



Naja, zuegeh, scho chli kitschig... aber ebe doch schoen...

Sunntigsusflug

Vorletscht wuchenend isch ganz edel gsi: am samstig bini zum erste mol zu chli „usgang“ in bangalore cho... bin mit es paar duetschae maedels wo i de stadt imene chinderheim schafed ines richtigs pub (jo, das gits do, bangalore isch die „pubstadt“ vo indie!), und s isch zwor nid de voll hammer gsi, well uf oepe hundert inder haet s gnau 2 inderinnae gha, aber d musig isch weniger uebel gsi als ich denkt het, und s bier do isch au ganz ok...

Am sunntig morgae simmer denn +/- frueh ufgstandae, und zwor so dass mer gnau i de groesstae mittagshitz a uesem ziil, emene chlettergebiet westlich vo bangalore, aacho sind... coolerwiis haets unterwegs en stand gha zum velo miete, und so isch denn scho mol zimli freud ufcho...



Uf em huegel haemmer denn nid nu e friedlichi uusicht, sondern au es paar indische climber aatroffae, wo ues denn grad au sponti chli gsichered hend...



Naja, und wo mer da seeli do gseh hend haemmer denkt noch velofahrae und chlettere isch jetz au no chli schwuemmae faellig... ui, isch da schoen gsi... so schoen dass sich sogar es paar inder (die 2 wo immerhin es bitzli haend

choenae schwuemmae) au grad ueberzuege loh hend (und die andere paar hend d uussicht gnossae (d h mini 2 maedels mit nassem oberteil) ;-)
[Di meiste inder sind glaub trotz hollywoodfilm und so doch no recht abstinent bis dass s denn wuerkli hueroted, und drum gseht me au en huufae mannae, wo, wells no ka fruendin haend oder dere zumindest nid doerfed physisch noeher cho, halt mit ihrem bestae kolleg „haendli hebed“...]

Boetli fahrae

Letscht weekend isch en groebere usflug aageit gsi: ich han vo de schuel doerfae en tag frei neh, und bi 13 stund mit em nachtbus (woni waeg mega stau in bangalore schier vopasst hetti) uf kochin in kerala im suedweste vo indie gfahrae...



doet gits sogenannti „backwater-trips“, do fahrt me mit eme gmuettlichae altae boetli aes paar stund zwuesched palmae und hammer-und-sichle-
emblem (kerala haet e sehr e starchi kommunistischi partei) hin und her und loht sich vowoehnae (siehe au „aessae“ wiiter unnae)... isch scho chli dekadent gsi, aber ebe doch sehr friedlich, und - well s low-season gsi isch – au meh oder weniger affordable...



In kerala git s aber nid nu backwaters, sondern au richtigs meer, und d fischer haend do vo de chinese e spezielli technik abglueged, wie au immer, die „chinesischae fischernetz“ sind zimli photogen...



Aessae (da isch en richtigae chesi-titel ;-)

Nued gege s tibetisch aessae, da isch au ganz edel, aber ich freu mi au immer wenn ich mol wieder vo de schuel weg chum und indischi delikatessae darf teste... zum biispiel i dem bild do hani mol wieder chli wedding crasher gspillt, und die 3 choech haend ganzi arbet gleisted...



und weli d bruut a dem hochziit so herzig gfundae han gits do grad no es foeteli vom frischbachaenae Ehepaar:



Denn hani do in whitefield no e inderin kaennaeglaernt, wo mich mol zumene richtig indischae zmorgae mit idli (daempfts riismehl) und kokosnuschutney iigladae haet...



lecker... und denn die feine chai a jedem egge... ich vomiss es jetz scho...
do no es bildli vo de vitrinae vo „minere“ baeckerei:



a propos, bin letschthin mol no imene chochkurs gsi, isch ganz luschtig gsi, die 3 andere teilnehmer (oder besser gseit teilnehmerinnae) sind alli glaub frisch vohueroted gsi (oder wordae), und well s jetz nuem dihei lebed moends jetz lernae chochae ;-)

Vocher („verkehr“ fuer die wo sich nonid so ganz a miis schriibae gwoehnt haend)

Die inder sind ganz uebel, bin letscht weekend am obed imene bus z vorderst vornae gsaessae, und s isch mer aso nid langwiilig wordae... wenn me luscht haet zum ueberholae denn wird eifach mol ghuped und gas geh, und wenn denn halt oeper entgege chunnt denn mues de eifach no chli meh uf d siitae... und wenn s noebed dem no en velo- oder toeflifahrer het (moeglichscht no ohni liecht), denn het eifach oeper pech gha...

Generell isch da uf de strossae glaub chli egoismus aagseit, so im stil vo ich mach jetz mol de schiiwerfer aa, denn gsehn ich chli meh, au wenn denn de wo entgege chunnt grad gar nuet me gseht...

erstunlicherwiis muesi aber zuegeh dass ich no kan wuerklichae unfall gseh han, usserd dass bim eintae andere bus woni mol drin gsaessae bin ufzmol uf de autobahn de rehti vorderpneu platzt isch... aber au do isch nid wuerkli was passiert...

uf dem foti do gseht me no di gaengigst transportart fuer familie:



desoefteren haet s au no 1 bis 2 chind hinnae oder vornaе druf... naja, und so oepis we en helm, fuer da isch s do natuerli vill z warm...
no es anders gschichtli: z bangalore isch eigentli immer en riisae vocher, we me au uf dem bildli do gseht:



ei mol isch aber mega ruig gsi, und au alli laedae sind zue gsi, und bues sind au keini gfahrae... de grund? Irgend en „bekaantae“ schauspieler wo i dere stadt grosswordae isch isch gstorbae... und denn sind alli luet so truurig gsi dass s grad nuem hend choene schaffae... und es paar haend vor luuter frust riisae tumult gmacht und autos und bues aazuendet... die spinnen, die inder...

Zum Schluss...

...no es chliises foeteli vom strand vo gokarna:



Meh muesi glaub nid saegae... mached s guet und gnuessed de summer

Liebi gruess us bangalore

Marcel / chesi / cheese

Ps. do no d ufloesig vom raetsel (?) i de letschtae uusgob:

wc-tuere mann: „king“

wc-tuere frau: „kong“ isch zwor e cooli idee gsi vo de lisa, s isch aber ganz simpel „woman“... froged mich nid we ma da soell interpretiere...